

四庫全書

集部

欽定四庫全書

集部

漁洋詩話卷下
師友詩傳錄
續錄

詳校官監察御史_臣劉人睿

侍讀_臣孫球覆勘

覆校官侍講_臣張燾

校對官中書_臣孫球

謄錄監生_臣陸費鑾

欽定四庫全書

漁洋詩話卷下

刑部尚書王士禎撰

宗人革字秋史歷城人康熙丙戌進士詩有別才有句
云亂泉聲裏才通屐黃葉林間自著書又黃葉下時牛
背晚青山缺處酒人行寄余云得名自公始失路復誰
憐時人亦呼為王黃葉

漢陽宗人戩字孟穀少游嶽麓題詩云不借直踏寒煙

裏麝香獨游亭午時其池陽山行長句過歐公廬山高
遠甚客中州與吳雯倡和風穴白茅寺諸篇工力悉敵
楚才自胡君信承諾顧赤方景星而外僅見此人

粵東詩派皆宗區海目

大相

而開其先路者鄺露湛若也

露南海人著嶠雅有騷人之遺音人日登越王臺云登
臺試人日此日謂宜人日照高臺色臺非故苑春青山
白雲路綠水流花津醉欲呼鸞去遙遙方杜鄰別人云
露斜山峭峭鐘斷水悠悠草綠斑駁怨花飛紅粉愁如

何雲夢月不共漢江流又送王孫去淮南桂樹秋廣州
破抱所寶古琴而死余為賦抱琴歌云嶧陽之桐何牂
牂緯以五絃發清商一彈再鼓儀鳳皇鳳皇不來兮我
心悲抱琴而死兮當告誰吁嗟琴兮當知之

木翼宗字石髮章邱人稱詩老於布衣余題其詩卷云
恥食嗟來鬢已斑吟髭撚盡一身閒惜君生後滄溟叟
不在華鬢襲勛間

馮廷樞字大木德州人康熙壬戌進士館選不得與以

中書舍人終近日才士之厄未有如大木之甚者其晴
川集余序而行之荆卿故里云一卷輿圖計已踈單車
徑入虎狼都縱然意氣傾燕市豈有功名到酒徒空向
夫人求匕首誰令豎子把頭顱南來曾過邯鄲道試問
人知劍術無又寂寞黃花時節雨淹留烏帽丈人祠半
篙谿水楓圍屋一片山雲雪到門此例甚多古選歌行
尤有可傳

張篤慶字歷友淄川相國憲松

至發

先生曾孫文章淹博

華瞻千言可立就詩尤以歌行擅場如邢太保賜劍行
趙千里海天落照圖歌等篇不失空同大復家法郢中
諸律詩正德嘉靖宮詞率多傑作丙戌客新城與余倡
和不下數十首和青谿張麗華小祠云淒涼三閣鳳臺
空誰向長城問舊公千古青谿谿上月人間無復景陽
宮不及夷光汎五湖千尋月殿已模糊惟餘無恙秦淮
水猶照臨春玉樹枯劍州鄧艾廟云奇兵未扼一丸泥
繇竹懸軍萬仞梯奄忽當塗更平聲典午翻嫌多事鄧征

西自古奇功未可居螳螂蟬雀竟何如縱然制勝陰平
道衛瓘誰知擁檻車一滴水可知大海味也

鍾嶸詩品余少時深喜之今始知其踳謬不少嶸以三
品銓叙作者自譬諸九品論人七畧裁士乃以劉楨與
陳思並稱以為文章之聖夫楨之視植豈但斥鷃之與
鯤鵬耶又置曹孟德下品而楨與王粲反居上品他如
上品之陸機潘岳宜在中品中品之劉琨郭璞陶潛鮑
照謝朓江淹下品之魏武宜在上品下品之徐幹謝莊

王融帛道猷湯惠休宜在中品而位置顛錯黑白淆譌
千秋定論謂之何哉建安諸子偉長實勝公幹而嵒譏
其以廷扣鐘乖反彌甚至以陶潛出于應璩郭璞出于
潘岳鮑照出于二張尤陋矣又不足深辯也

康熙辛亥宋荔裳

琬

施愚山

閔章

皆集京師與余兄弟倡

和最久明年壬子荔裳補官蜀臬余典蜀試先後出都
門既而余以十月下峽荔裳以明年春上峽遂不相見
是歲荔裳入覲歿於京師後二十八年庚辰余官刑部

尚書蒨裳之子思勅來京師以入蜀集相示亟錄而存
之集中古選歌行氣格深穩余多補入感舊集畧其二
三短章於此次黃州云賦成赤壁人如夢江到黃州夜
有聲憶故鄉海錯絕句銀刀一名八帶魚云銀花爛漫委筠

筐錦帶吳鉤總擅場千載專諸留俠骨至今七箸尚飛
霜筆管蛭云雕蟲小伎舊知名食邑由來號管城曾與
江郎書恨賦莫將刀筆博公卿題督郵爭界石云蜀國
至今悲杜宇楚人終是戀鴻溝可謂精切著題

張光啟字元明章邱人少見知於麻城梅長公

之煥

金華

朱未孩

大

兩公年四十棄諸生隱白雲湖上闢小園曰

省園蒔花種竹絕跡城市有元廉處士

復

之風山中曉

起云初日照西山藜杖行共拄山氣何濛濛人物亦太古池上云倚杖池邊立西風荷柄斜眼明秋水外又放一枝花對菊云種菊叢叢傍石根凌晨坐卧近黃昏沽來新釀經秋醉開盡寒花未出門皆隱者之言也

申鳧盟

涵

先稱詩廣平開河朔詩派其友雞澤殷岳伯岩

永年張蓋覆輿曲周劉逢源津逮邯鄲趙湛秋水皆逸
民也諸子既歿惟秋水無恙余丙子再使秦蜀於褒城
驛見其登太行詩一篇信是奇作惜不記憶其全矣太
行高萬仞絕磴霾雲間雪壓雁門塞冰齊熊耳山鳬盟
之弟觀仲煜涵孝廉余為誌其墓

松江有白燕菴袁海叟故居也康熙丙戌門人周策銘
彝翰林寫其遺集相寄編首有空同大復二序余感而
題之云鼎足高楊爾不慙百年遺跡改名藍烏衣王謝

俱零落七字風流白燕菴

汪鈍翁

琬

吳江絕句云江上西風滿棘枝夕陽遙映去

帆遲不須便作思歸計且為鱸魚住少時徐昌穀詩森
森太湖秋水濶扁舟搖動碧琉璃松陵不隔東南望楓
落寒塘露酒旗二詩風味何其相似

劉春虛字挺卿其詩超遠幽夤在王孟王昌齡常建祖
詠伯仲之間考其人蓋深於經術不但詞華也李華三
賢論曰劉名儒史官之家兄弟以學著稱述易詩書春

秋禮樂為五說條貫源流備古今之變尚書劉公每有
勝理必詣與談終日忘返殷直清有識尚恨言理少對
未與劉面常想見其人高適達夫落落有奇節皆重劉
者也按唐書儒學文苑皆不為舂虛立傳而全唐詩話
唐詩紀事亦畧之故詳於此

程先貞字正夫德州人侍郎紹之孫也有海右陳人集

才情不及盧德水

世准

而深穩過之如豐侯歌葛巴刺梳

歌火蓮行諸篇皆有逸氣

莆田宋珏字比玉善八分而小詩亦工嘗記其一絕云
來時梅瘦未成花別後垂楊金作芽他日相思如見畫
板橋西望是吾家

山陰陳洪綬崇禎末以畫得名亦能詩有憶舊絕句云
豐溪梅雨山樓醉竺塢茶香佛火眠清福不知今日憶
神宗皇帝太平年

周侍郎櫟園

亮工

示友云海水羣飛百尺高同君城上擁

弓刀戰瘢莫向燈前看恐惹霜華上鬢毛輓楊秀才云

唾地新詞破錦囊
高樓君自拜滄浪
文人命薄將軍死
誰賦城南舊戰場

宣城唐祖命

允甲

故明中書舍人也
去官後有詩云殘花

野蕨園荒若破帽
疲驢避長官頗似
徐文長疲驢狹路
愁官長破帽殘衫
拜孝陵

徐繼恩字世臣
武林名士後為浮屠
名止岳字齋堂為
詩清麗不落凡近
一字畧其絕句數
首御教場中月直
時下山全不道歸
遲三松影落半湖
水一路沿鐘到淨

慈晉人名理宗莊老剡縣風流說謝支雖為神州鍾紫
氣惜君未見馬駒兒人家竹樹渺茫間浦溆林巒不記
灣安得帆隨湘勢轉為君九面寫衡山幾日春游遍若耶
入城滿面是煙霞正愁仙福難消受又喫人間御貢茶
扁舟絕壁酌西風千古英雄在眼中欲得周郎重回顧
銅弦鐵板唱江東坡公所謂無蔬筍氣者也

周簋字青士秀水人居梅里隱於市廛偶游嘉善假一
園居停一夕嘯詠甚適遂至達旦鄰有郡丞行署時來

按部聞周詠詩聲亦達旦不成寐恚甚詰旦遣隸勾捉將加戮辱有士大夫援之乃得免或述此事余笑曰使袁虎不遇謝鎮西幾不免虎口一座大笑

唐濟武檢討在武林夜宿天竺聞鄰房二僧詬訾聲中夜不息友人將諭解之唐曰無庸此不過文殊普賢廝打耳

門人張桐峰

琴

淵靜沈默作歌行踔厲風發而不失規

矩揚州人無知其工詩者余取其詩入感舊集琴舉康

熙癸丑進士未仕卒

安邱二曹禮部貞吉字升六中丞申吉字錫餘兄弟齊名禮部在京師和余文姬歸漢圖等長歌極有筆力中丞淪沒異域未見其止祭告湖南有句云雪花飛過洞庭去愁對斑斑湘竹林

余澹心

懷

莆田人居建康常賦金陵懷古詩不減劉賓

客謝公墩云高卧東山四十年一堂絲竹敗符堅至今墩下瀟瀟雨猶唱當時奈何許孫楚酒樓云江南城西

酒樓紅無數楊柳迎春風孫楚去後李白醉千年不見
紫髯公雨花臺云雨花臺上草青青落日猶銜木末亭
一綫長江三里寺千年鶴唳九秋螢勞勞亭云蔓草離
離朝送客驪駒愁唱新亭陌夜深苦竹啼鷓鴣空牀獨
宿頭皆白順治辛丑屬嚴子餐沅寄余廣陵余答詩云
千載秦淮水東流繞舊京江南戎馬後愁絕庾蘭成鍾
阜蔣侯祠青谿江令宅傳得石城詩腸斷蕪城客

古今武人詩如沈慶之曹景宗輩猶有文士之風獨北

齊高敖曹詩龍鍾千口牛蟬連百壺酒朝朝圍山獵夜
夜迎新婦此等語斷非文士所能道若斛律金風吹草
低見牛羊則樂府絕唱矣

呂潛字半隱故明兵部尚書大器之子流寓江左有詩
云橫江閣外數帆檣立盡西風鬢欲霜只有鄉心不東
去蚤隨煙月上瞿唐

尤悔菴侗在史館作明史樂府雖擬李西涯而往往駕
出其上又常作外國竹枝百首

劉公弢欲往蘇門留詩別余與鈍翁石臞輩云燕市酒
徒稀後旬日余賦登高詩云十年長事少袁絲公弢見
之笑曰何相報之速耶

昔在揚州劉公弢寄書曰聞有鐵帆者住木蘭院豈天
寒衣衲重鐵帆耶然新寒衣衲重乃釋一靈詩句非鐵
帆也

會稽曾益注李長吉詩世知之矣晚又得其所注溫岐
八義集乃吳郡顧氏刻本宋天社任淵注宋景文黃山

谷陳后山三集可謂獨為其難於益亦然益字謙

傳山字青主亦字公之佗太原高士其子眉字壽髦能
為古賦常賣藥四方其子輓車晚憩逆旅輒課讀史漢
莊騷諸書詰旦成誦乃行祁縣戴楓仲廷拭撰晉四家詩
山父子居其二

林確齋者亡其名江右人居冠石率子孫種茶躬親畚
鍤負擔夜則課讀毛詩離騷過冠石者見三四少年頭
著一幅布赤脚揮鋤琅然歌出金石竊歎以為古圖畫

中人

方僉山

文

桐城人居金陵少多才華晚學白樂天好作

俚淺之語為世口實以己壬子生命畫師作四壬子圖

中為陶淵明次杜子美次白樂天皆高坐而已偃僂於

前呈其詩卷余為題罷語座客曰陶坦率白令老嫗可

解皆不足慮所慮杜陵老子文峻網密恐僉山不免嘖

藤條耳一座絕倒

吳之洞庭山有丐者汪鈍翁記其數詩有云不信乾坤

大飄然世莫羣口吞三峽水脚踏萬方雲有形皆是假
無象孰為真悟到無生地梅花滿四鄰

宋元憲景文兄弟少賦落花詩得大名刻畫可謂極工
然沈石田青樓粉暗女子嫁朱門烏啼賓客稀更不刻
畫而有言外之意唐人高閣客竟去小園花亂飛則尤
妙也徐元歎一首云花意寒欲去登樓送所思將分春
雨恨似與遠人期野水斷村路孤煙生竹籬吾徒從此
逝忍見艷陽時妙亦不減唐人

己未博學宏詞之舉田綸霞

雯

以工部郎中與馬已而

被落題溫飛卿集後云一代才名乾驥子八吟义手亦
徒然不教詞賦陪彫輦空讀南華第二篇然不十年官
至巡撫江南僉都御史

林茂之詩客来自何處為言南山頭昨夜片時雨新添
春澗流入白門云白門迢遞夕陽間千里閩天一日還
依舊客情無別事逢人都問武夷山芳草云春風吹百
卉草色遍相侵到處沒馬足有時驚客心速連空漢上

寒漾碧波潯獨有明妃冢青青恨至今又孔雀菴云依
然一茅宇宛在千竹林秦淮新漲云春雪消谿岸江潮
上水門雪夜簡胡彭舉云今歲山城雪偏於昨夜深同
為閉戶客故自絕相尋同喻宣仲鷺峰寺聽秋鶯云物
候遷移愴客魂啼鶯何意戀山村不因落葉林間滿猶
道啼春在寺門潯陽別曹汝載云扁舟客思共閒餘分
手那堪即到初明月中秋九江水愁人無暇作鄉書又
雲樹見楚色詩篇聞越吟黃鳥暫啼去清風時下來右

皆與曹能始吳非熊北倡和時作刻意六朝未染楚派者也

朱竹垞

要

著書最富如日下舊聞經籍存亡考皆餘百

卷又撰詩綜詞綜若干卷其自著詩歌雜文曰竹垞文類者余為序之尤愛其少時永嘉諸詩如南亭云薄雲雨初霽返照南亭夕如逢秋水生我亦西歸客西射堂云已見官梅落還聞谷鳥啼愁人芳草色綠遍射堂西孤嶼云孤嶼題詩處中川激亂流相看風色暮未可纜

輕舟吳橋港云聞說吳橋港荷花百里開當年王內史
五月櫂船迴瞿谿云鳥驚山月落樹靜谿風緩法鼓響
空林已有山僧飯飲吳郎宅云吳郎愛客解千齡勸飲
青絲挈玉餅落日兒童齊拍手過江三日幾曾醒祁六
座上逢沈五云東陽年少沈休文五載相思兩地分今
日謝家羣從在青綾帳外更逢君

孫豹人

枝蔚

三原人居廣陵卓犖負奇氣一日游焦山中

流遇風賦詩云風起中流浪打船秦人失色海雲邊也

知賦命元窮薄尚欲西歸太華眠

劉宋沈忠武慶之應詔賦詩云朽老筋力盡徒步還南
岡按客座贅語周處讀書臺下舊為光澤寺乃梁武帝
舊居其地又名南岡六朝士大夫多居之武帝評書云
南岡士夫徒尚風軌不免寒乞正指此乃知沈所居在
南岡字非汎設以此悟注詩之難

新安汪徵遠字扶晨工於詩古選尤閒澹有王韋之風
若黃山詩不見山中僧微雨潭上來不愧古人其從弟

洪度字于鼎余嘗定其全集歌行如建文鐘湖熟菜等篇皆見史筆非苟作者

漢武帝秋風辭足跡騷人李嶠汾陰行能使明皇感動流涕真絕唱也家兄西樵吏部從弟幼華

又

旦都諫皆有

作西樵云千秋睚上見遺祠武帝雄風自一時法駕逶迤齋殿啟靈壇颯沓羽旂披禮成侍從陪游盛情極君王感物悲陳跡祇今誰髣髴白雲南雁望參差幼華云東風紫燕入叢祠河上人家記漢儀古碣半淪天上水

蒼松全折雨中枝，依佛三燭流光夜。想像千官立仗時，
最喜啼鶯猶未歇。看花一路到汾隄，亦無慙才子之目。

幼華詩本三首
皆佳不具錄

余丙子再使蜀於綿州見羣鹿賦詩云：繞郭涪江碧玉
流，一川豐草鹿呦呦。遠游忽憶楊岐語，爭似渠儂得自
由。盖用楊岐方會禪師語也。余兒啟涑和之用唐呂溫
由鹿賦。由此鹿以致彼鹿，故曰由鹿。余深賞其確切能
押險韻。又按宋景文云：率鳥者繫生鳥以來之，曰鬬呂。

盖得其意而不知說文有此圖字也

徐延壽字存永閩人徐煥興公之子也家鼇峰藏書與
曹能始謝在杭埒移家湖南道廣陵與余定交有過燕
子磯作云馮夷吹浪齧山根雲樹千重暗白門故壘尚
聞雙燕語空江曾見六龍奔楊花暮雪行人路杜宇春
風古帝魂扣柂中流頻喚酒客情難遣是黃昏

伍瑞隆字鐵山香山人竹枝詞云蝴蝶花開蝴蝶飛鷓
鴒草長鷓鴣啼庭前種得相思樹落盡相思人未歸

戴本孝字務旃和州人詩畫皆絕俗常貽余畫冊自題
詩云叢薄何翁歲喬木無餘陰斧斤向天地悲風摧我
心不知時榮者何以奮高深草木亦爭榮攀援與依附
凌霄桑寄生滋蔓尚可懼惜哉不防微良材化枯樹在
京師一夕聞人談二華之奇晨起即襍被往游其興會
不羈如此弟移孝字無忝

仲兄禮吉

士禧

少時有和唐祖詠望終南殘雪詩三首云

微風打窗紙凍雀鳴簷端起看松竹色蕭蕭增薄寒將

雪無雪色色在浮雲端煨芋對新雪骨與梅花寒遠山
直西牖高高出林端朝來望新霽四顧清光寒

七言歌行杜子美似史記李太白蘇子瞻似莊子黃魯
直似維摩詰經

七言歌行至子美子瞻二公無以加矣而子美同時又
有李供奉岑嘉州之勑闢經奇子瞻同時又有黃太史
之奇特正如太華之有少華太室之有少室

益都孫文定公

廷銓

詠息夫人云無言空有恨兒女聚成

行諧語令人願解杜牧之至竟息亡緣底事可憐金谷
墜樓人則正言以大義責之王摩詰看花滿眼淚不共
楚王言更不著判斷一語此盛唐所以為高

孫文定詠史云田叔歸來竇后傷蕭條梁苑下微霜一
時賓客多枚馬不遣雄文悟孝王

戴叔倫論詩云藍田日暖良玉生烟司空表聖云不著
一字盡得風流神出古異澹不可收采采流水逢逢遠
春明漪見底奇花初胎晴雪滿林隔谿漁舟劉蛻文冢

銘云氣如蛟宮之水嚴羽云如鏡中之花水中之月如
羚羊挂角無迹可求姚寬西谿叢語載古琴銘云山高
谿深萬籟蕭蕭古無人蹤惟石焦堯東坡羅漢贊云空
山無人水流花開王少伯詩云空山多雨雪獨立君始
悟

今世俗所傳吟窗雜錄最純繆可笑如第一卷詩格曰
魏文帝撰而有雙聲疊韻迴文之類豈建安之代已先
有沈約四聲及璿璣圖詩耶

小說載李習之翱在潭州嫁柘枝妓事以為韋蘇州舒元興詩云誰是蔡邕琴酒客魏公懷舊嫁文姬古今以為佳話而不知其污蟣賢者也按應物為蘇州刺史在貞元之初其後又有韋夏卿在貞元十年韋覲在元和時與習之之世差近而翱與應物固渺不相及也且韋李二集俱在亦無一字相涉則蔡邕琴酒之語何竟武斷屬之左司耶李觀元賓集中有代人上韋蘇州二書每疑其暴戾恣橫不類左司所為觀與翱同元和中人

皆與左司無涉此二事皆不可不辯也乾元中又有韋黃裳韋之晉大中時又有韋某誌失名所稱韋蘇州蓋不下六七人矣人但知有左司耳

金陵張可度字蜀筏廬山詩云父居黃閣女崆峒流水桃花石室中多少男兒淪落盡神仙卻讓李騰空騰空者林甫之女李太白有送內之廬山訪女道士李騰空詩余往讀林甫外傳疑之天上豈有不忠孝神仙耶吾鄉劉節之孔和有詩云淮南畔諸侯趙高賊宦官神仙

乃如此何足容譏彈此名通之論也

詩話類編一條最可笑者高適為兩淞觀察使過杭之
清風嶺僧院題詩云前峯月落一江水僧在翠微開竹
房及台州事竣復過此欲改一江為半江僧言前有一
官人過此言詩佳矣但一字不如半字高驚問為誰僧
曰駱賓王也余案駱與高二人世代遠不相及達夫亦
未嘗為兩淞觀察使乃賓王既代宋之間吟樓觀滄海
日矣爾時已稱老僧何時又鍊形住世復還俗作官人

而為達夫改此詩耶真可令人噴飯又案此詩乃晚唐
任翻之作

亭皋木葉下隴首秋雲飛太液滄波起長楊高樹秋皆
柳文暢作六朝名句灼然在人耳目詩話類編乃以為
趙松雪詩且云置之齊梁矯矯有氣當是松雪偶書二
詩遂誤以為趙作耳此何異瞽人道黑白耶

楚人門巷瀟湘色竟陵胡君信

承諾

句野航人遠雁聲低

侯官許有介

友句

程孟陽

嘉熈

鈔選中州集康熙丁亥門人汪于鼎

洪度

寄新

安舊刻本請余刪補將重鐫梓余觀其去取多不愜人意報書已之如劉迎無黨之歌行李汾長源之七言律為中州集之冠而去取猶未當其他可知

董樵萊陽高士康熙初游婺郡閨秀倪氏仁吉高其人製方竹為杖遺之倪有絕句云怨入蒼梧斑竹枝瀟湘渺渺水雲思分明記得華清夜疎雨銀缸獨坐時

趙士喆字伯濬掖縣人明副都御史燿之子太宰煥從

子也甲申避兵松椒山遂不歸與弟子董樵耦耕海上
著石室談詩建文年譜遼宮詞各若干卷弟士亮士冕
等皆能詩

邊習字仲學歷城戶部尚書華泉先生仲子有睡足軒
詩一卷紙札草惡猶是當日真蹟亡友徐東癡裝潢而
藏之余既刻華泉集又刪存仲學詩一卷附刻於後其
佳句云野風欲落帽林雨忽霑衣薄暑不成雨夕陽開
晚晴宛有家法

余選華泉集刻成又選劉吏部希尹集得若干篇希尹
名天民歷城人及與華泉相倡和古選在華泉之上五
言近體精深華妙遠不逮邊矣

同年傅侍御彤臣

辰

吾邑人博雅能詩作詞曲亦跌宕

有致常於滄州道上賦柳枝詞二十首略載於此絕代
容華照眼明幾年聲價重金城誰言青鬢垂垂老一到
臨風百媚生零露蕭晨半未乾日高猶自怯輕寒連錢
驄馬驕嘶過青眼樓頭帶笑看殘照芙蓉溢頰紅珊瑚

仙骨玉瓏璁幾回眠起嬌無力披拂偏宜少女風垂金
小篆不曾譌葉葉紛披撇與波截柳編蒲無用處祇傳
新樣似元和靈和前殿見風姿成薛耽情寫艷詞九月
受風秋色裏冶游心醉麴塵絲拂隄又復映征帆折贈
還宜女手摻薄暮一番微雨過江州司馬濕青衫

南海鄭露集有詩云峻嶺極金隣摩天見九真按升菴
集云張籍蠻中詩銅柱南邊毒草春行人幾日到金湍
金湍交趾地名水經注所謂金湍清渚是也湍與鄰通

今刻本作麟非

劉公弼畫不及其詩常使金陵畫師吳宏

字遠度

捉刀余

每索其畫輒先之以小柬云勿煩真作公弼面訊其故
余笑應之曰兄畫如宣城兔毛褐真不如假耳公弼大
笑

孫寶侗字仲孺益都相國

止亭

仲子有才氣善詩文然持

論好與余左余蜀道詩高秋華嶽三峰出曉日潼關四
扇開孫議之或曰此本昌黎非杜撰也孫憤然曰昌黎

便如何畢竟是兩扇又題涪州石魚云涪陵水落見雙
魚北望鄉園萬里餘三十六鱗空自好乘潮不寄一封
書孫駁之曰既是雙魚合道七十二鱗余聞之笑曰此
之謂鼉廝踢

蕭山毛竒齡大可不喜蘇詩一日復於座中訾訾之汪
蛟門懋麟起曰竹外桃花三兩枝春江水暖鴨先知云云

如此詩亦可道不佳耶毛怫然曰鶩也先知怎只說鴨
江都門人汪懋麟字季角亦字蛟門詩才雋異古文學

王介甫游吳題寒山寺云吳中池館日吹簫只有寒山
寺寂寥搖落江楓對漁火行人歸去雨瀟瀟題顧符稹
畫云昭陽顧生畫樓觀絳闕瑤房生白雲如螳宮人三
百六丰神都似李將軍

喻武功總制

成龍

金州人余官刑部尚書時喻為侍郎余

嘗定其塞上集前後出塞諸篇酷儗少陵如秋風入代
郡萬籟聲蕭蕭崑崙十日雨星海宜汎漲丈夫既捐軀
豈能依骨肉立馬望黃河天青塞雲紫又風雪灑邊塵

天際莫雲紫山銜落照明戈鋌寒光裏語多警絕又聞
笛云夢裏悠揚橫笛聲高天露下共淒清愁來江漢人
何處望裏闕山月倍明萬里孤雲隨絕漠十年羸馬更
長征誰知一曲中宵怨霜雪無端兩鬢生

門人林石來

麟
唱

莆田人康熙庚戌進士自禮部郎中督

學貴州其玉巖詩集余為序之閩舊無牡丹惟塢山獨
有數本石來題詩云催放鼠姑花信風錦茵銀燭照鞋
紅何當澹月慈恩寺傳徧新詞到六宮品題國色總尋

常姚魏爭誇麗衆芳不是宣和翻舊譜何人解賞女真黃

閩詩派自林子羽高廷禮後三百年間前惟鄭繼之後
惟曹能始能自見本色耳丁雁水煒亦林派之錚錚者
其五言佳句頗多如青山秋後夢黃葉雨中詩鶯啼殘
夢後花發獨吟時花柳看憔悴江山待祓除皆可吟諷
丁晉江人歷官湖廣按察使

董樵江東懷古詩云春風嗚咽嗚珂地寒雨淒涼散臘

辰又春風公瑾墓細雨呂蒙城樵有詩三四十卷屬余
論定未及報而樵卒

門人宗元鼎梅岑詩以風調為主酷學才調集七言如
來逢鶯語詩從作去聲去被人留酒重醺雙柑香澣佳人

手半臂寒添酒客肩煬帝冢云帝業興亡世幾重風流
猶自說遺蹤但求死看揚州月不願生歸駕六龍揚子
江云帆勢天涯去不迴龍笳何惜渡江來香車若到長
干路後主荒宮花又開新亭云東晉江山暮雨秋新亭

人士昔時游徒聞王導神州語周顓先收作楚囚吳音
曲云壁月瓊花夜夜重隋兵已斷曲阿衝麗華鄰上能
多記偏忘牀前告急封留鄒訐士祇謨云新開蘭蕙正芳
菲初到鰒魚入饌肥最好流光是三月如何拋卻渡江
歸

甲辰歲西樵戲為蟲豸詩二十首盖有所感慨而作余
見之曰此卞彬蚤蟲賦之流也腹與龜腸潔聲無清露
遙何緣塵垢裏強著伴金貂蟬早讀漆園書夢亦羨栩栩

栩魏收自輕薄胡為波及汝

蝶

共道輸君獨牽絲巧若

神祇應同吉網莫便詡經綸

龜

手推故神物名流解望

塵將軍揖客少莫訝叩頭頻

叩頭

汝腹能幾許禪中漫

鬪雄還思蟲父語直有魯連風

蟲

爾軀既已輕爾行復

能跳無如湯沐頻有時亦相弔

蚤

委贄大蘭王項領足

意氣縱解認前身詎羨轉輪貴

牛領

託體槃瓠族豕蟲

畧相類狗苟而蠅營名實竟雙備

蠅狗

雖遊戲三昧然非

才人不能道也

蕪湖江岸有螺磯上有昭烈孫夫人祠余甲子使粵歸
過之題二詩云白帝江聲尚入吳靈祠片石倚江孤魂
歸若過劉郎浦還憶明珠步障無霸氣江東久寂寥永
安宮殿草蕭蕭都將家國無窮恨分付潯陽上下潮

西粵風俗淫佚男女婚媾皆以歌辭相酬和同年吳冉

渠

洪

嘗撰粵風續九一卷凡民歌徭獠狼蜨布刀扇歌

皆具其詞雖侏儻而頗有樂府清商子夜讀曲之遺民
歌如胡蝶思花不思草兄思情妹不思家兩岸人煙相

對出祇隔青龍水一條已娘莫學鯉魚子那河又過別
條河天旱黿龜結夜網想晴只在暗中絲黿龜結網三
江口水推不斷是真絲科舉秀才取紅豆相思及早辦
前程黃菊花開九月九枝枝葉葉有孃名徭歌云黃蠶
細小螫人痛油麻細小燭仁香鴨兒細細著水面表因
細小愛憐孃蠶歌云錯畔行過蘇行巷魚穿水透到花
街木犀花發香十里胡蝶聞香水面來餘獐狼諸歌則
非譯不能通曉矣

明末七言律詩有兩派一為陳大樽一為程松圓大樽
遠宗李東川王右丞近學大復松圓學劉文房韓君平
又時時染指陸務觀此其大畧也大樽警句如左徒舊
宅猶蘭圃中散荒園尚竹林九龍移帳春無草萬馬窺
邊夜有霜九月星河人出塞一城碁枰客登樓禹陵風
雨思王會越國山川出霸才石顯上賓居柳市竇嬰別
業在藍田禁苑起山名萬歲複宮新戲號千秋四塞山
河歸漢闕二陵風雨送秦師松圓警句如瓜步江空微

有樹秣陵天遠不宜秋
梅殘燭燼西窻雨雪
香濃小閣雲古寺正
如昏壁畫層湖都作
水田衣夢裏楚江昏
似墨畫中湖雨白於
絲遠雁如塵飛水面
亂帆疑葉下吳頭迴
峯凍雨皆成雪出霧
危巒半是雲多年華
鬢絲相似三月春愁
水不如礪飲斷虹明
積翠湖飛片雨亂斜
陽羽聲變後寒風急
虹影消來白日過城
上雪聲遊子屐縣南
風色酒人家嶽寺夜
眠春礪雨浦樓寒醉
雪山風皆不愧古作者

長洲文與也

點

衡山裔孫畫有家法常為鄢陵梁曰緝

熙作江邨讀書圖汪芑文

琬

題詩云鄢陵壁色平如掌

也有江南此景無余見之曰吳子乃爾輕薄芑文笑曰
子勿多言行且及子乃賦一絕云髣髴春江綠樹陰幾
回掩卷幾沈吟江南與汝干何事賦得愁心爾許深以
余詩有江花江鳥不相識寫向丹青俱眼明之句云余
又題苔文讀書圖云朱門鼎鼎厭梁肉忍飢誦經無此
人娜如山中好水石他年真作孟家鄰娜如即雅宜山

也

會稽姜

棟

鐵夫句云青山吟鮑謝紅燭寫莊騷

劉考功公弼

體仁

客鳳陽一日同友人蘇

銘

茂旂過龍興

寺訪老衲流連竟日始別蘇歸邸夢公弼來笑吟詩云

六十年來一夢醒飄然四大御風輕與君昨日龍興寺

猶是拖泥帶水行覺而異之忽聞剝啄聲則公弼僕人

至云已坐脫矣

門人陳子文

奕禧

自黔南歸補南安太守未幾病卒蔣靜

山

仁錫

哭之云已亡飛鳥驚蛇蹟又失嶽崎歷落人子文

書法名當代人尤豪雋余方欲作哀輓見靜山詩遂為
閣筆

唐杜牧之張好好詩并序真蹟卷用硬黃紙高一尺一
寸五分長六尺四寸末闕六字與本集不同者二十許
字卷首楷書唐杜牧張好好詩宣和御筆也又御書葫
蘆印雙龍小璽宣和連珠印後有政和長印政和連珠
印神品小印內府圖書之印董其昌跋云樊川此書深

得六朝人氣韻余所見顏柳以後若溫飛卿與牧之亦名家也愚案宣和書譜唐詩人善書者賀知章李白張籍白居易許渾司空圖吳融韓偓杜牧而不載溫飛卿然余從它處見李商隱書亦絕妙知唐人無不工書者特為詩所掩耳此卷今藏宋太宰牧仲家

余襄陽懷古詩云豈有酖人羊叔子更無悔過賓連波殘碑墮淚迴文錦一種銷沈可奈何首句陸抗語次句山谷詩皆成句也

漁洋詩話卷下